



Broj: T18 0 KT 0019280 26
Brčko, 25.06.2026. godine

Optužnica potvrđena dana: 30.06.2026. godine

Na osnovu člana 35. stav (2) tačka h) i člana 226. stav (1) Zakona o krivičnom postupku Brčko distrikta BiH, podižem:

OPTUŽNICU

Protiv:

J.K., rođen dana 1965. godine u Bosanskom Šamcu,

Što je:

Dana 30.01.2026. godine, u Brčko distriktu BiH, na adresi Bulevar mira br. 1, u prostorijama Pododjeljenja za matičnu evidenciju Odjeljenja za javni registar Vlade Brčko distrikta BiH, znajući da nije polagao završni ispit u januarskom ispitnom roku 2001. godine u javnoj obrazovnoj ustanovi „Školski centar Pljevlja” niti je stekao zvanje kvalifikovani vozač motornih vozila u drumskom saobraćaju i znajući da se radi o ispravi koja sadrži neistinite podatke o završenom obrazovanju i koja nije izdata od strane naznačenog izdavaoca, svjestan radnje koju preduzima, što je i htio, referentu ovjere na uvid predočio ispravu naslovljenu kao „Diploma o položenom završnom ispitu”, koja glasi na ime J.K., u kojoj se navodi da je izdata od strane javne obrazovne ustanove „Školski centar Pljevlja” u Pljevljima dana 28.10.2001. godine i upisana pod rednim brojem glavne knjige 637/01, djelovodnim brojem 14522, a kojom se potvrđuje da je njen nosilac položio završni ispit i time stekao srednje obrazovanje trećeg stepena stručne spreme, zanimanja kvalifikovani vozač motornih vozila u drumskom saobraćaju, kao i fotokopiju te isprave – prepis, predstavljajući referentu ovjere da se radi o autentičnoj ispravi istinitog sadržaja, usljed čega je referent izvršio ovjeru prepisa stavljanjem pečata ovjere i službenog pečata i istu evidentirao u knjigu ovjere pod brojem ovjere 1890, a potom je, znajući da se radi o neistinitoj ispravi, službenici zaposlenoj u Odjeljenju za obrazovanje Vlade Brčko distrikta BiH, ovjereni prepis isprave priložio uz Zahtjev za nostrifikaciju i ekvivalenciju inostrane školske svjedodžbe broj predmeta UP-I-37-000080/26, kojim Zahtjevom je tražio da se od strane Komisije za nostrifikaciju i ekvivalenciju inostranih školskih svjedočanstava Odjeljenja, izvrši nostrifikacija i ekvivalencija priložene diplome i formalno potvrdi vrijednost kvalifikacije navedene u istoj,

dakle, dovođenjem u zabludu nadležnog tijela učinio da ono u javnoj ispravi ovjeri štogod neistinito što treba služiti kao dokaz u pravnom prometu i takvu ispravu upotrijebio znajući da je neistinita,

čime je učinio krivično djelo – Ovjeravanje neistinitog sadržaja – iz člana 369. stav (2) u vezi sa stavom (1) Krivičnog zakona Brčko distrikta BiH.

****Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.****
